



*Jumat, 24 Maret 2023*  
**Ogen: Matius 1:18-19**



**"Ialoken Jusuf Uga Litna"**



**S**alah sada biak si banci nampati dingén mabai kita nggeluh alu dame e me biak “ngaloken uga litna” nandangi situasi rikut pe ras teman-teman si man hadapenta. Biak ngaloken uga litna enda mpengasup kita dingén erbahan kita la sakit tupung kita ngidah si kurang payo, kurang sikap, kurang mejile, kurang mediate bage pe kurang ngergaken. Biak enda ngasup ngidah kekurangan i bas diri teman, ngasup ngaloken situasi si mungkin la bagi ukur janah pe erbahan kita banci meriah ras ise pe.

Jusup e me kalak si bujur janah selaku tunangen Maria, ialokenna situasi Maria si nggo mehuli kulana erkiteken Kuasa Kesah Si Badia. Jusup la mpersoalken dingén la mpedegang-gedang kondisi ras situasi si paksana i hadapina ras Maria tunangenna. Kebujuren Jusup teridah arah perbahanen si ilakokenna man Maria selaku tunangenna. Labo lit sura-surana ngaduken Maria gelah ola iakap Maria mela. Situasi si ihadapi Jusup ras Maria labo situasi si gampang erkiteken erkawiten ras kesah bage pe erga diri janah banci saja ia ngaloken hukuman erkiteken enggo ngelanggar aturen keagaman tapi erkiteken Jusup ngaloken Maria uga litna, seh maka teralokenna dingén idalanina kondisi si mberat e. Jusup tetap ngaloken Maria rikut ras kondisina.

Perdalanen kegeluhen rikut pe ras situasi si megati man hadapenta, kerinana labo bagi ukur. Erteman kita tapi banci jadi teman e ka si ncikuraki kita, erjabu kita tapi keluarga e ka si meneken kita, erusaha kita tapi banci saja temannta si bali usahana ras kita mburuk-burukken kita, erkiniten kita tapi banci saja teman sada kiniten e nipu kita, meriah kita ras keluarganta banci saja e dalanta meling. Tentuna situasi ras kondisi si bage rupa banci si hadapi alu teneng dingén la kita sakit adi kita ngasup ngaloken teman uga ia litna, bali bagi Jusuf ialokenna Maria tunangenna si nggo mehuli kulana.